

Grad Novi Pazar  
Skupština grada  
Odbornička grupa SDA Sandžaka  
Novi Pazar  
09. februar 2022. godine

**P R E D S J E D N I K U**  
**SKUPŠTINE GRADA NOVOG PAZARA**

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ODLUKE O POKRETANJU INICIJATIVE ZA OSNIVANJE REGIONALNOG FONDA ZA RAZVOJ SANDŽAKA**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red na sjednici Skupštine grada koja će se održati 10. februara 2022. godine.

**Predsjednik odborničke grupe**  
Ahmedin Škrijelj

## **PRIJEDLOG**

Na osnovu člana 79. stav 1, tačka 2) Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018), člana 15. stav 1, tačka 38), člana 147. Statuta grada Novog Pazara („Službeni list grada Novog Pazara“, broj 6/19), i člana 137. Poslovnika Skupštine grada Novog Pazara („Službeni list grada Novog Pazara“, broj 6/19), Skupština grada Novog Pazara na sjednici održanoj 10. februara 2022. godine donosi

### **ODLUKU O POKRETANJU INICIJATIVE ZA OSNIVANJE REGIONALNOG FONDA ZA RAZVOJ SANDŽAKA**

#### **Član 1.**

Skupština grada Novog Pazara traži od Vlade Republike Srbije i drugih državnih organa da radi obezbjeđivanja ravnomjernog i održivog regionalnog razvoja preduzmu potrebne radnje u cilju osnivanja Regionalnog fonda za razvoj Sandžaka.

#### **Član 2.**

Skupština grada od Vlade Republike Srbije i drugih državnih organa traži:

- donošenje Zakona o Regionalnom fondu za razvoj Sandžaka;
- da se Regionalnom fondu za razvoj Sandžaka utvrdi status samostalnog pravnog lica sa Upravnim i Nadzornim odborom, Direktorom i stručnom službom;
- zastupljenost predstavnika lokalnih samouprava iz Sandžaka (Novi Pazar, Tutin, Sjenica, Prijepolje, Priboj i Nova Varoš) u Upravnom i Nadzornom odboru Regionalnog fonda za razvoj Sandžaka;
- da godišnji budžeta Regionalnog fonda za razvoj Sandžaka iznosi najmanje 7 % u odnosu na budžet Republike Srbije te da se sredstva Fonda se mogu koristiti za izgradnju kapitalnih infrastrukturnih objekata od regionalnog značaja i podsticaje za razvoj privrede a naročito poljoprivrede.

**Član 3.**

Ovu odluku dostaviti Vladi Republike Srbije.

**Član 4.**

Ovu odluku objaviti u "Službenom listu grada Novog Pazara".

**SKUPŠTINA GRADA NOVOG PAZARA**

Broj:

U Novom Pazaru, \_\_\_\_\_. \_\_\_\_\_. 2022. godine

**PREDSJEDNIK**

Dr. Anela Šemsović

## **O B R A Z L O Ž E N J E:**

### **Pravni osnov:**

Pravni osnov za donošenje ove odluke sadržan je u:

- članu 79. stav 1, tačka 2) Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018),
- članovima 15. stav 1, tačka 38) i 147. Statuta grada Novog Pazara („Službeni list grada Novog Pazara“, broj 6/19),
- članu 137. Poslovnika Skupštine grada Novog Pazara („Službeni list grada Novog Pazara“, broj 6/19),

### **Razlozi za donošenje odluke:**

Pokretanje Inicijative za osnivanje Regionalnog fonda za razvoj Sandžaka predstavlja u prvom redu jedan od načina rješavanja višestoljetne nerazvijenosti Sandžaka koja izuzetno pogađa i građane Novog Pazara. Usled strateškog zapostavljanja i siromašenja Sandžaka od strane centralnih vlasti u Beogradu te sve više izraženijeg odliva mlađe populacije, usvajanje ove odluke odnosno Inicijative da se osnuje Fond za razvoj Sandžaka predstavlja jednu od mjera koju je potrebno preduzeti da bi se prekinuo otvoreni diskriminatorski odnos prema građanima Novog Pazara i Sandžaka. Ravnomjerni regionalni razvoj kao ustavna obaveza utvrđena članom 94. Ustava Republike Srbije očigledno ne važi za prostor Sandžaka i Novog Pazara. Usvajanjem ove odluke kreira se mehanizam putem kojeg se može implementirati Ustavom utvrđena obaveza kada je u pitanju ravnomjerni i održivi regionalni razvoj.

### **Objašnjenje pojedinačnih rješenja propisanih ovom odlukom:**

**Član 1.** Utvrđen je predmet odluke.

**Član 2.** Utvrđene su pojedinosti koje se odnose na status, rad, unutrašnju organizaciju i finansiranje Regionalnog fonda za razvoj Sandžaka.

**Član 3.** Propisana je obaveza dostavljanja ove odluke Vladi Republike Srbije.

**Član 4.** Propisana je obaveza objavljivanja ove odluke u „Službenom listu grada Novog Pazara“.

**Finansijska sredstva potrebna za realizaciju ove odluke nisu potrebna**